

Ministère de l'Agriculture, de la Viticulture et du Développement rural, 8
Référence: 197/2022
16 MARS 2022
A traiter par:
Copie à:

Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, de 15. Mäerz 2022

Här President,


esou wéi d'Chambersreglement et virgesäit, biede mir lech, dës parlamentaresch Fro un den Här Landwirtschaftsminister weiderzeleeden.

Bedéngt duerch de Krich an der Ukrain stellen sech ëmmer méi Froen am Hibréck op d'Versuergungssécherheet mat Liewensméttel. Esou wuel Russland, wéi och d'Ukrain ware mat déi gréissten Exporteure vu Kären a weidere Liewensméttel, déi och fir d'Hierstellung vu Fudderméttel gebraucht ginn. An deem Kontext héiert een och hei am Land, ë.a. vu verschiddene Landwirtschaftsvertrieder, datt Lëtzebuerg eng gewësse landwirtschaftlech Autarkie misst ustriewen, fir esou méi onofhängeg vun internationale Konflikter, déi en Afloss op d'Ernierungssécherheet kënnen hunn, ze agéieren. Kuerzfristeg stellt sech an deem Kontext déi pertinent Fro, ob Lëtzebuerg net elo direkt sollt Gréngland fir d'landwirtschaftlech Notzung brauchbar maachen.

An deem Kontext hätte mir folgend Froen un d'Regierung:

1. Denkt d'Regierung driwwer no, elo direkt op de Wee ze goen, fir Gréngland als Akerland brauchbar ze maachen, fir datt eis Bauere beschtefalls nach dëst Joer méi Terrainen zur Verfügung hunn, fir Fudder- an/oder Liewensméttel unzebauen? Wéi gesäit hei déi gesetzlech Basis aus fir dës Prozedur?
2. Wa jo, wéi eng konkret Schrëtt gedenkt d'Regierung ze ënnerhuelen, fir dëst esou séier wéi méiglech ëmzesetzen?

Mat déiwem Respekt,



Fred Keup
Deputéierten



Jeff Engelen
Deputéierten



Äntwert vum Minister fir Landwirtschaft, Wäibau a ländlech Entwécklung op d'parlamentaresch Fro n°5934 vu den éierbaren Deputéieren Fred Keup an Jeff Engelen

- 1. Denkt d'Regierung driwwer no, elo direkt op de Wee ze goen, fir Gréngland als Akerland brauchbar ze maachen, fir datt eis Bauere beschtefalls nach dëst Joer méi Terrainen zur Verfügung hunn, fir Fudder- an/oder Liewensméttel unzebauen? Wéi gesäit hei déi gesetzlech Basis aus fir dës Prozedur?**
- 2. Wa jo, wéi eng konkret Schrëtter gedenkt d'Regierung ze ënnerhuelen, fir dëst esou séier wéi méiglech ëmzesetzen?**

Neen, d'Regierung denkt net driwwer no, fir verstärkt bestoend Gréngland an Akerland ëmzewandelen. Dëst ass kontraproduktiv am Sënn vum Schutz vu Natur, Waasser, Biodiversitéit a Landschaft.

Dobäi kënn, datt d'Gréngland ee ganz wichtege Karbonspäicher ass an dowéinst gefërdert muss ginn, fir dem Klimawandel entgéintzewirken.

Sou eng generell Ëmwandlung vun Dauergréngland an Akerland wär am Kader vun der Konditionalitéit vun der gemeinsamer Agrarpolitik och guer net erlaabt.

A gewësse Fäll kann awer Gréngland ëmgebrach ginn, zum Beispill fir eng Erneuerung.

Am Kader vun der Greeningprimm ass den Ëmbroch vu Gréngland prinzipiell geneemegungspflichteg.

Am Kader vun der Landschaftspflegeprimm ass e verbueden, ausser eng Ausnamegeneemung läit fir.

Ëmweltsensibel Dauergréngland duerf guer net ëmgebrach ginn, dat sinn d'Grénglandbiotoper, Grénglandflächen an Iwwerschwemmungszonen HQ 100. Des Konditioun gëtt an Zukunft ob HQ 100 extrem ausgeweit. Ee Verstouss géint des Reegel féiert zu enger Kierzung vun de Flächeprimmen.

Am Kader vun der Landschaftspflegeprimm duerf Dauergréngland, wat an "Natura 2000"-Gebidder oder an Naturschutzgebidder läit respektiv als wäertvollt Dauergréngland kartéiert ass, net ëmgebrach ginn.

Déi genau Modalitéiten, déi den Erhalt vum Dauergréngland concernéieren, fënnt een um Landwirtschaftsportal vum Landwirtschaftsministère ënnert der Rubrique *Beihilfen > Cross Compliance und Dauergrünland* ënnert folgendem Link: <https://agriculture.public.lu/de/beihilfen/cross-compliance-dauergruenland/dauergruenland.html>.

Lëtzebuerg, den 25. Abrëll 2022

De Minister fir Landwirtschaft, Wäibau a ländlech Entwécklung,
(s.) Claude HAAGEN